

+H
 corpus: ReF.MLU
 language-area: südbairisch
 language-region: ostoberdeutsch
 language-type: oberdeutsch
 genre: V
 medium: Handschrift
 time: 15,2
 reference: Hs.: Blatt (r/v), Kolumne (a/b), Zeile
 corpus-sigle: F048; III-Ac-V1,H
 text: Passion Sterzing
 text-author: -
 text-type: erbauliche Texte (unteraltende Literatur: geistliches Spiel)
 assignment_quality: -
 hoffmann_wetter_nr: -
 library: Sterzing, Stadtarchiv
 library-shelfmark: Hs. II
 date: 1481/96
 place: -
 text-place: -
 printer: -
 edition: Wackernell: Altdt. Passionsspiele aus Tirol Graz 1897
 size: -
 language: fnhd
 literature: -
 notes-transcription: - lateinische Überschriften in Rot; keine doppelte Markierung +L und; - Vers- und Seitenzählung der Edition mit angegeben (Vers = {V..}; Seite = {S...}); - an einigen Stellen der Hs. erscheint es, als seien einzelne Buchstaben (oft mitten im Wort) rubriziert; es scheint aber so, als wäre die Tinte mglw. ausgeblasst; in der Transkription nicht mit umgesetzt; - im Text finden sich kleine Zettel mit den Namen der Schauspieler an der jeweiligen Stelle; diese sind hier nicht mit übertragen (siehe auch Spielerverzeichnis bei Wackernell S. Lff.); - einzelne Buchstaben zu Beginn eines Verses scheinen fast gedoppelt zu sein; habe ich nur als Majuskel umgesetzt (z.B. 23v,23); - gibt zwei Grapheme für I/J; beide Grapheme werden jeweils für I und J verwendet; - Überschreibungen über Vokalen meist Umlautmarkierungen; so auch umgesetzt; bei ä keine Umlautmarkierung, sondern nur graphische Markierung; - häufig sind im Text Teile eines Verses in anderen Zeilen fertig geschrieben; ich habe das mit den Kürzeln udZ (unter der Zeile) und üdZ (über der Zeile) umgesetzt; stellenweise können es aber bis zu 5 Zeilen oberhalb oder unterhalb des Verses sein, das wurde nicht extra gekennzeichnet; - \{}&1: für das Kürzungszeichen beim Wort Jesu; - \{}&2: Kürzungszeichen, Hakenähnliches Zeichen über n; steht für Ône; - : diese Zeichenkombination wurde immer für die Superskripte über v,w und y genutzt, egal ob Striche, Punkte oder Welle (letztere ist Umlautbezeichnung); - Trennzeichen im Wort, ohne unmittelbare Zeilentrennung: ein Teil des Wortes wurde mit Verweiszeichen udZ oder ÜdZ weitergeführt; - Anfänge der Zeilen nach Absatz stets etwas vergrößert; meist deutlich am Absatzbeginn; in Transkription nicht markiert; - Trennung von n und u durch Vokalmarkierung nur 02v30 bei \$under; als *; - im Fließtext häufig v und w, aber auch z als Majuskel; nicht markiert; - zwei verschiedene markierte y-Graphien: y: -> Welle; Punkte oder zwei Striche; y' -> deutlich ein Strich über dem y; - Kürzung von e vor l: l_ z.B. in 4r29 müml_; - ungenetisches t am Wortende bei rockt (33v05); - Seiten 44v und 45r weisen rote Flecken auf; - latein. Liedtexte, welche mit Neumen überschrieben sind, sind nicht rot; - prädikative Adjektive: in diesem Text nur 'wahrnehmen' zusammengezogen; 'kund tun' und 'lieb haben' o.ä. nicht zusammengezogen; eventuell noch nachholen; - Lateinische Passagen in der Regel rubriziert; hier keine R-Markierung; wörtliche Rede in schwarzer Tinte; nur an einer Stelle ein Einschub in deutscher Sprache mit schwarzer Tinte (30v,27-28)
 abbr_ddd: PassSterz
 extent: FnhdC: -; compl: 1r - 48v (Volltext)
 extent-size: FnhdC: -; compl: 6.861 WF
 @H

F048-01r,01 In nomine eius cenam desiugnare Intendimus Primo precursor Dicit Nu merchkt Ir herren all
 geleich Payde arem vnd auch reych Frawen vnd auch man Bas ich ewch zw sagen han Jch pin ain pot vorher gesant Vnd
 mach ewch allen pekant Was wir mit disem figur wellen bedewten Vnd thuen kunt allen lewtten Am Ersten wiert ewch
 kunt getan Wie über ihm den man Falscher rat geben ist Durch die Iuden mit pössem list Jn irem falschen rat Das
 merckt an disser stat Als er lasarum erbeckt hett Darum er von den Juden grossen neyd ledt Sy werdent sich ains rats
 vermessen Des wirt iudas nit vergessen Der wirt suchen zergäncklich guet Und wirt verkawffen das vnschuldig pluert Vmb

dreissig phening an derselben stat . Damit er sich geit in ewige not Ewch wirt auch getzaygt das abentessen Des sich ihsus hat vermessen Damit er ent hat gegeben Der alten ee vnd dem iüdischen leben Vnd solt darnach mercken ein Wie ihsus den iungeren sein Wuesch ir füess zw derselben stunt Das wirt ewch auch werden kunt Vnd darnach wie er gieng an den perg oliuet / Als er vormals gewönlich tet Da rüeft er an den vatter sein Das er in über hüeb der grossen marter pein Von grossem angst wart er erhytzet Das er pluettigen schwayß schwytzet Das kain truckner vaden an Jm was fürwar sag ich euch das Da kam ain engel von got den vatter dar Herab gesant von der himelischen schar Vnd sagt ihsu es möcht nit anderst sein Er solt leyden des todes pein Wan durch In so müst erlöst werden All menschen hye auf erden Zw ander mal padt Jhsus den vater sein Ob sy möchten an dye pein Gen himel kummen vnd padt Ob das wär mit seinem götlichen rat Das es geschäch mit seinen willen Doch so wolt er erfüllen Der propheten geschrift vnd sag Damit alles das käm an den tag Das dye propheeten uerkündet hyetten Das möcht im nyemant verpietten Vnd wart darnach getröst durch des engels schein Von den himelischen vatter sein DarEin sich ihsus mit gantzen willen gab Vnd wolt auch nit lassen ab Sunder es müst als erfüllt werden Mit seinem todt hye auf erden Seydt vnd ye mensch wardt geporen WIr wärn sunst all verloren Darnach so kumbt der Juden schar Mit grossem gewalt dar Vnd Iudas der valsch verrätter sein Der in Jn marter vnd pein Wirt völschlichen geben Vnd pringen vm sein heyligs leben Das er nymmer wirt püessen Des last ewch heint nit verdryessen Sunder zw hertzen flyessen Vnd gedenckt damit seiner grossen pein Damit wir von im nymermer ge

F048-01r,02 schayden sein Deinde Iudei intrent ad lotum consilii et cantent Colegerunt pontifices Iudeus usuenientibus Jn simul cum caypha et anna Primus Iudeus ponit questionem ustra Jh m Dicens Primus Iudeus Ir herren wir wellen ewch klagen Jh{1}s der hat vns geschlagen Aus dem tempel alle Mit fräuelichem schalle Dartzw verschüt er mir mein saltz Gersten linssen prein vnd schmaltz Tawben vnd alles das ich mocht han Vnd het im doch nye laydt getan Secundus Iudeus Ir sült wissen lieben herren Das ich dartzw kam von verre Das er sprach wir wären all verloren WIr wurden dan tzw den anderen mal geporen Das ist alles vnmüglich ding Got geb das vns pas geling Tertius Iudeus Ir lieben herren ich tue ewch kündet Was mir geschach zw derselben stundt Er verschüt mir mein silber vnd golt Pillich ir das rechen solt Quartus Iudeus O lieben herren das Ist alles nicht Gegen der fräuelichen geschicht Vnd vmb den grossen vnfueg Wie zorniklichen er vns schlueg Mit seiner gaysseluetteten Den leser sach man plüetten An seiner kallen styrne Durch sein hawbt vnd hirne Wardt geschlagen auf den todt Er hat noch nicht vberwunden dye not Moyses schlueg er tzw derselben stunt Das im das pluett ran vber den mudt . Dye schmach sol ewch pillich missuallnen Dye vns ist peschechen allen Annas respondit Fürwar das ist ain pöse phlicht Der dise sach nit für sicht Darumb Ir herren wil ich ewch sagen Als ir das volk allhye hört klagen Von ih{1}u der sich nennet crist Der doch ain verkerer ist Des volkes und der rechten ee Er tuet vns allen sammen wee Mit seiner newen lere Man hat es ye gehört mere Das volk werdt kain fryst Als es nun in das volk kummen ist Das ist mir sicherlichen kunt Sol es weren kain stunt Das volkch wirt gantz verkert Vnd vnnser ee wirt gantz zerstört Das sy geschwüeren offenwar Was er sagt es sey alles war Darum gebt rat wie man es fürsech Das die sach nit mer geschech Rabi samuel Das ding nyemant für kan sechen Das wil ich offenwarlich iechen Dyeweill er das leben hat Vnd also vnter dem volck gat Auf seinenn tot vnd auch sterben Süllen wir alle werben Oder er uerkert vns all tzeant Beyb kint man lewt vnd lant Annas dicit ad nicodemum Nicodemus was rattend dw Vns zw dissen sachen nun Nicodemus dicit Was rattes welt ir das ich thue Jch kan nicht ratten dartzw Wan dye ler dye er hat Vnd dye werckt dye er begat Sind dye an Jn von got kummen Als ich von im hab vernommen Man sicht es an allen enden Seine wunder tzw lenden Schnelle vnd in kurtzer frist Ob es von got kummen ist Darumb lebet sunder ane not Jch rat nicht auf seinen tot Sein ler vnd sein leben sindt schlecht Vnd in allen dingen gerecht Annas ad nicodemum Phui dich dw pösser trugner Dein hertz ist aller eren lär Flewch pald von vnnserem rat Schnelliklich vnd auch trat Nicodemus recedit Annas querit silium a Joseph ab aromathia Ioseph werder Edler man Von aromathia nu sag an Vnd rat weyslich dartzw Was man in dyssen sachen thue Ioseph ab aromathia Dicit Ich kan nicht dartzw Iehen Jch han gehört vnd gesechen Von ih{1}u nicht dan guettes Jch pin im holdes muettes Vmb seiner lere raichen Vnd vmb dye wundertzaichen Dye müessen ye von got kummen Jch hab nie von im vernumen Darum ich ymmer welle geben Ratt noch hylf an sein leib vnd leben Jr werdet auch noch wol ynnen Was ir an seinem todt werdent gewinnen Wan sein ler pleybt vn tzerprochen Vnd das vbel wirt gerochen Darumb habt eweren gemach Vnd kümmer ewch vm ander sach Annas ad ioseph Flewch von vns hin Dein hertz vnd auch dein sin Vns nie was recht gemainet Das hast u an deiner red wol bescheinet Ioseph recedit Annas q querit a Zedanio Zedonius was rattend dw Vns zw dyssen sachen nu Zedonius Respondit Was sol ich ratten an des todt Der mir gesechende augen pot Da ich plindt wardt geporen Vnd het mein gesicht verloren Das wisset alle ane spot Er ist mein herr vnd mein got Das wil ich reden offenwar Wer anderst spricht der sagt nit war Annas dicit Zedonio Flewch von hinnen pald Das dein vngelück wald Wilt u sein nicht enperen So müss wir dich anderst leren Jnter Zedonius dicit ad Iudeos Habt Ir nicht gehört WIE sein ler zerstört Vnser ee vnd vnnser wort Sein dem volk vn gehort Wan es volget nach seiner phlicht Nyemandt vns In Eren sicht Wan man wil vnnser ler nicht geren Sol die sach icht lenger weren WIr kummen von seiner ler Vmb leyb guet vnd er Darumb sült ir rat geben WIE wir im widerstreben Succentur In sinagoga Dicit WIr solten Jn nu langst han Verderbet haben an allen wan Ee sich sölich vbel hyet ergangen Zw vnnserem laster vnd auch schanden WIr hietten vrsach gehabt genug An falscher ler dye er trueg Magister Sinagoga Dicit Süllen wir das lenger leiden So müess wir vnser ere meiden Auch hab ich daran gedacht Das er am sabbat gesunt macht So hyes er den tempel prechen Das süll wir pillich rechen Es mag nit gantz gerochen werden Las wir in leben hye auf Erden Et tunc duo canunt Vnus autem ex ipisen Quo finito Cayphas Canit Expedit uobis ut vnus moriatur Et dicit Cayphas Ir wist all nit

was ir sagt Was ir redt oder klagt Hört meines rattes phlicht Oder wist ir das nicht saluator disponnten Wer sich an nymf gothait Dem ist von Rom widersayt Als ih{1}s der sich nennet got Dannocht ist ain grösser spot Wer sich zw künig hat erkoren Der hat des kayssers huld verloren Als der verkerer tuet Nu höredt alle meinen muet Jch ways sicher offenwar Werdent z dye von rom gewar Das er sich nennet ain got Vnd ainen kunig sicher an spot Vnd das wir gestatten das Sy werffent an vns Iren has Vnd zerstörent vns zehant Payde lewt vnd auch lant Er guet weyb vnd auch kindt Sy erstörent alle die hye sindt Sy vertilgent vnser ee Darumb ist wäger vil mee Das ain mensch sterbe Dan das das volk als verderbe Stirpt er so ist das volk genessen Darumb süllen wir fleyssig wesen Das er werdt getöttet gar Vnd doch nicht ze offenwar Vnd nicht an dem hohtzeytlichen tage Das nit werd auflawf vnd klage Des volkes mürml wurd tze uil Dyssen rat ich ewch geben wil Annas dicit Chayphas der herre hat Geben den pesten rat Des sol vns wol benügen Vnd jh{1}m vachen so wir erst mügen Magister Sinagoga Dicit Ir herren Ir solt ewch nicht vergachnen Seydt ir ih{1}m begunt zw vachen Vnser rat sol auch pleiben in der stille Das er nicht erkenn vnseren wille Wan wurd er des gewar Er vnd auch sein iungerschar Sy wurden sich darumb gedencken Vnd in kürzt von vns wencken Jn ander gegent vnd auch lant Dye verkertten sich auch zwhant Vnd wurd ir ler im volk gemerckt Vnd dye valschait also gesterckt Das ir nyemant möcht widersten So wurd auch straff über vns gen Darumb gedenckt das wir in ergreyffen Das er vns nit müg entschleychen Das wir in auch behefften Das er mit seinen künsten vnd krefft Wider vns nit müg geringen Vnd dartzw nit müg enttrinen Postea scola iudeorum canit Ab illo ergo dye Et iudey manent in loco consily Deinde saluator Ingredit cum discipulis et canit homo quidam fecit et disponitur cena Et Petrus dicit saluato : Herr disse österliche Zeyt Mit irrer zwkunft vns nachent leydt Nu hettest dw dich vermessen Das Osterlamp zw Essen Mit dein Iungeren sunder wan Nu solt dw vns wyssen lan Wo dir das sey zw muet Da wellen wir es machen guet Saluator dicit Pettre vnd Iohanes hebt ewch auf dye vart Vnd get hin in dye stat trat Das sol ewch ain Zaychen sein Alspald ir get zwm tor hinein So entgegen ewch ain man zwhant Ain krueg tregt er in seiner hant Vnd er get nach wasser an den pach Dem folgt in sein hawß nach Sagt im wye ich mich hab vermessen Jch well pey im das osterlampt essen Das er des also fleyssig sey Wan mein martter wont mir nachent pey Iohannes dicit saluatorj Lieber herr vnd maister mein was dw schaffest das sol sein Deinde cum venerint ad portantem aquam Petrus dicit Guetter man dir sey bekant Vnser maister hat vns gesant Vns zwen zw dem herren dein Wo ist sein haws das thue vns schein Homo portans lagenan aquen dicit Ich weyß ewch auff das rechte spor Get mir nach ich gee ewch vor vnd tzayg ewch zw disser fryst Wo meines herren hawß ist Et sic vadunt ad hospidem Qui dicit Seidt willikom Ir herren guet Saget an was ist ewch tze muet Iohannes dicit Herr das Thue wir dir pekant Vnser maister hat vns gesant Vns tzwen zw dir vnd spricht Er well des osterlappes phlicht Pey dir heint hynnen essen Er hat sich des vermessen Das er vnd auch sein iunger gemein Dye hochtzeyt wellen pey dir sein Hospes dicit Dye wort hab ich gern venummen Hayset in frölich kummen Vnder meines hawsses dach Jch will im schaffen guetten gemach Das mueshaws lanck weyt vnd prayt Leych ich im zw disser hochtzeyt Iohannes dicit hospitj Got geb dir den ewigen lon Jn seinem hymelychen tron Vnd entladt dich aller pen WIr wellen nach vnserem mayster geen Et sic vadunt pro saluatore Scola iudeorum canit Petrus dicit saluatorj Wolauß herr das Ist perayt Was dw vns hast vor gesayt Das ist alles sicherlich fürwar Gerecht nach deinem willen gar Et Sic intrat Ih s cum discip lis Et canit : Quia parata sunt omib Hospes dicit saluatorj Willikum lieber maister mein Dw vnd all dye iunger dein Jch hab ewch all geren ein genummen lieber gest ich nye hab gewonnen Pey meinen tzeytten als ich yetz han Das solt ir wissen an argen wan Saluator dicit hospitj Dlr wirt gelonnet manigualtiklich Das dw vns so frewntlich Er enpewttest vnd enphangen hast Gross almuessen dw daran begast Hospes dicit Ich Tuen es williklich vnd geren Jch wil ewch allesamtb geweren Guettes frydes ane neydt Jn meinem hawß zw disser zeyt Et tunc saluator dat eis sedem et canit Venite medite panem meum Postea saluator cum suis discip lis ad mensam sedens Et deaposisit sibi cibaris medunt Scola iudeor canit Postea Saluator canit Desiderio desidera

F048-01r,03 ui hoc pasca manduca Et dicit saluator Begir die In meinem hertzen leydt Hat Begert vil lange tzeyt Wle ich das Iüngste ostermal Mit ewch näm zw diser wal Ee das ich herttikliche not Erlydt vnd auch den pitteren tot Iohannes dicit saluatorj Herr dein künftige arbayt Jst vns allen von hertzen layt Postea saluator cingit lintheo Et dicit ad disci

F048-01r,04 pulos Ir sült alle sitzen stille Das ist mein guetter wille Hintz das ich ewch allesamtb Gewasch das sey ewch pekant Dye füess das sol pillich sein Warumb das wirt ewch darnach scheiin Postea lauau pedes incipiens adiuda cantans Mandatum nouum do uobis Et cum venerit ad petrum Petrus dicit ad saluatoren Herr dw wascht mir dye füesse nicht Was mir halt darumb beschicht Saluator dicit ad petrum Petre dw solt dich waschen lan Als dye anderen haben getan Petrus dicit ad saluatoren Herr das thuen Ich nymmer Vnd solt ich leben ymmer Es kumbt mir nit in meinen muet Wan dw pist mir dartzw zw guet Saluator dicit ad petrum Pettre wasch ich dir die füesse nicht So sag ich dir wie dyr geschicht Es ist dein grösstes vnhayl Wan dw wirst haben kainen Tayl Mit mir in meines vatters reych Das solt u wissen sicherleych Petrus dicit ad saluatoren Nain herr das sol nit sein hawbt füess vnd die hende mein Solt u waschen schyre Ee das ich wärllich verlire Tayl in deinem reych Jch wil ee sicherleych Das dw gantz nach deiner begir Waschest alle gelider mir Et tunc saluator lauau Petrum et canit mandatum Saluator dicit ad Petrum Petre was hye durch mich geschicht Des magst u noch wissen nicht Es wirt dir aber noch schein Das wyssst auf dye trewe mein Tunc sedent ad cenam Saluator dicit ad disciplosen Ir Seydt rain an{2} allen wan Wan ich ewch gewaschen han Allesamtb gemaine Aus genummen ainen allaine Applin canunt Postquam denus cenauit Saluator dicit ad discipulos Ich will ewch all hye wissen lan Was ich euch yetz hab getan Da solt ir zaichen nemmen pey Das der maist vntter ewch sey Als der ninste sicherlich Jr nennet herr

vnd maister mich Nu hab ich ewch gewaschen gar Dapey solt ir nemmen war Das ir vnter ewch sült pegan Als ich ewch yetz hab getan Iterum saluator ad discipulos Ich wil ewch geben ain neue ee Das osterlamp sol nicht me Furwar ich sag ewch das Es ain betzaichung was Der newen ee vnd anderst nicht Hinfür man niessen sicht Mich für das lamp in prottes schein Jch pin das lamp das der sünden pein Aller welt auff im trayt Jch sag ewch dye warhait Jch pin dasselbig himelprot Vnd wer mich newssset ane spot Der stirbt zw kainer tzeit Des ewigen todes nit Deinde Ih s accipiens panen Gracias agens frangit et Dicit ad discipulos Nempt hin des prottes schein Da ist mein leyb verporgen ein Der für der welde sündig leben Wirt in den pitteren todt gegeben Consimilnr accipiens calicen Benedicit Et dicit ad discipulos Trinckt das tranck vil freyden pirt Das ist mein pluet das für ewch wirt Vergossen vnd für all menschait Dye alt ee ist hin gelaydt Das ist der kelch der newen ee Wie oft ir das dthuet ymmer mer So weget ir mein leydlliche not Vnd den herttiklich tot Et sicc medunt et bibunt Scola iudeorum canit Saluator dicit ad discipulos Saget an wo lies Ich ewch ye Pey mir ain gepresten hye Petrus dicit saluatorj Nain dw herr sicherlich Das redt wir all gemainklich Saluator ad discipulos Dauon wer zwen röckt hab Der thue sich des ainen ab Vnd kawff darumb ain schwert Das ist das mein hertz pegert Phylippus dicit saluatorj Schaw lieber herre wert Wir haben hye tzway guete schwert Saluator ad discipulos Dye sindt wol vnnser fueg Damit ist sein auch genueg Saluator iterum ad discipulos Ich wyl ewch klagen zw disser frist Das vntter ewch ainer ist Der wirt mich Jn den tot geben Wäger wär im das sein leben Bär zw der welde nicht geporen Wan er hat leyb vnd sel verloren Tunc contristati incipientes Singuli dicere primo Petrus dicit saluatorj Herr lieber maister mein Wirt ich daran schuldig sein Iohannes dicit saluatorj Herr wirt ich der sein Der dich wirt pringen in so grosse pein Iacobus maior dicit saluatorj Herr Thue mir das pekant Ob ich derselbig sey genant Philippus dicit saluatorj Herr Jch frag dich an allen spot Pin ich derselbig der dich geit in den tot Thomas dicit saluatorj Herr sag mir an als geuär Pin ich der verrätter Bartolomeus dicit saluatorj Herr der frag ich mit gantzen willen nun Pin ich s der vnrecht wirt tuen Matheus dicit saluatorj Herr ich pit dich zw disser frist Thue vns pekant wer der ist Mathias dicit saluatorj Herr ich frag dich mit gantzen meinen sinen Wer wirt das übl Beginen Iacobus minor dicit saluatorj Maister der frag ich von dir pger Wirt ich s der verrätter Simon dicit saluatorj Herr sy haben dich schier all gefragt Jch pit dich das dw mir das sagst Andreas dicit saluatorj Herr ich peger das an dich Pin ich der das lass wyssen mich Iudas canit alta voce Nimquid ego sum rabj Et dicit saluatorj Mayster sag an pin der Der dich geyt Jn des todes ger Saluator submissa voce canit Tu dixisti Et dicit Jude Iudas dw hast es gesaydt Mir nächent von dir arbayt Deinde discipuli contristantur et mutuo querentes oculte quis Sit traditurus ihm^{1} et dum re

F048-01r,05 uenerunt ad ioh^{1}em Johanes recumbit spra pectus domini Et dicit saluatorj O Ewiger got pin ich der Der dich geyt in des todes ger Saluator dicit Johanni Ich verkündt dir das hewtte Dem ich ietzunt mit willen pewtte Das in geduncke prot Der geit mich in des todes not Et tunc Jntingit panem Jn Scutellam et porrigit Jude Et dicit Jude Des dein hertz willen hat Das thue wehendiklich vnd auch trat Scola iudeorum canit Interim Judas vadit oculte ad principes Sacerdotum Et in medio obuiat sibi diabolus Qui dicit ad Judam Iudas Ich wil dir ain guetten rat geben Darumb merck mich gar eben Dye salb ist vnnützlich vergossen Dye deines maisters hawbt hat genossen Nu pist u in deines maisters vngenad kumen Vnd deine recht sind dir vast genumen Dreyssig phening wärn dir worden prayt Das gelawb mir für dye warhait Gee hin noch pald vnd an der stat Mit mir an der Juden rat Dye werden dir noch dreyssig phening geben Das dw verattest deins maisters leben Tunc iudas uenerit ad principes Sacerdotum et clamat alta voce Quid wltis michi dare et ego vobis eum Tradam Et dicit Judas Ich versten an euch das disser ratt Vber ih^{1}m von nasareth gat Was welt ir mir geben Jch wil ewch sein leyb und leben Schon geben in ewer hant Das thue ich ewch sicher pekant Annas dicit Jude Ia wir geben dir was dw wild kainer gab vns weuld Wes dein hertz von vns pegert Des solt u von vns sein gewert Judas dicit iudeys So gebt mir gering Dreyssig silbrein phening So wil ich euch schaffen ane wan Was ich ewch verhaissen han Annas dicit Jude Dye wellen wir dir geren geben Nym hin das dich got laß leben Dw warst ye ain frumer knecht Nu thue dissen sachen recht Vnd schaff wye man es an richten sol Wan wir erkennen sein nit gar wol Vnd schaw das wir nit vülen sein Wan der erst schad wär dein Tunc annas mediante R mo Dat iude pecuniam Et dicit Se hin wir geben dir gar gering Dysse dreyssig silbrein phening Judas dicit Judeys Mich penügt an dyssem gelt wol Darumb thuen alles das ich sol Jter^{1} Judas dicit iudeis Ist das nur ewer wille So schweygt hyetzw stille Wan ich gar wil gar tugentleichen Wider hin tzw im schleychen Das mein nymant werd gewar Schyer so kum ich wider dar So luegt das man sey peraydt Als ich ewch vor han gesaydt Annas dicit iude WIr tuen was dw schaffest Gedenck das dw es nit verschlaffest Tunc Judas recedit ad cenam Scola Judeorum canit Saluator interim dicit Nun ist erklärt des menschen sun ane spot Vnd in im ist erklärt worden got So nu got in im erklärt worden ist So ist er in im selb erklärt zw disser fryst O Jr lieben sün mein Ain klaine tzeit wird ich pey euch sein Ir werdet suechen mich darnach Vnd als ich tzw den iuden sprach Wo ich mir hin zw gen hab für genumen Da mügt ir noch nit hin kumen Aso thue ich euch auch kunt Ein news gepot gib ich euch zw disß stunt Das ir anainander solt lieb han Als ich ewch lieb gehabt han Jn dem werden euch all menschen erkenen Vnd ewch mein auss erwelt iunger nennen So ir die lieb manigualt All schon vndereinander behalt Petrus dicit saluatorj Lieber herr vnd mayster mein Wo geest u hin das thue vns schein Saluator dicit petro Wo ich yetzund hin wird gen Da magst u mir nit pey pesteen Aber über ain tzeit schyer Wirst u sicherlich nach volgen mir Petrus dicit saluatorj Herr warum solt ich yetz nit nach uolgen dir Das thue gütlich verkünden mir So ich doch mein sel an spot Für dich will setzen in den todt inter Saluator dicit petro Petre dein sel wirst u sicherlich Jn den todt setzen für mich Fürwar fürwar sag ich dir Ee das der han heint krät zwir So wirst u verlaugen mein Drey mal das thue ich dir schein Inter Petrus dicit saluatorj Wyse lieber herre mein Verlaugen sy auch all dein Jch verlaugen dein nymmer Vnd solt ich leben ymmer Saluator subiungit

Ewr hertz sol nit betrüebt sein Es sol auch kain schrick kumen darein Gelawbt ir in den lebentigen got So gelawbt auch in mich ane spot In meines vatters reich Sein vil wonung sicherleich Vnd wär etwas minder daran Jch hyet euch s auch kunt getan Darumb gee ich hin dar Vnd berayd euch dye stat fürwar Jch wil euch auch zw mir nemen dahin Das ir auch seyt wo ich pin Jr wysset auch wo ich hin gen Den weg tuet ir auch versten Thomas dicit saluatorj Herr wir wyssen nit wo du hin wild gan Wie mög wir des wegs dan kuntschaft han Saluator ad discipulos Jch pin der weg sag ich euch eben Dye warhait vnd auch das leben Nyemand zw meinen vatter kumen mag Dan durch mich fürwar ich euch sag Vnd hyet ir erkennet mich So hyet ir auch erkant mein vatter sicherlich Jr werdt in auch erkennen füran Wan ir in habt gesechen schon Philippus dicit saluatorj Herr tzayg vns den vatter dein So wellen wir all wol benügt sein Saluator ad discipulos Jch pin pey euch so lange tzeit Vnd ir habt mich nit erkennet seydt Phylippe der mich sicht fürwar Der sicht auch meinen vatter klar Wie sprychst u tue vns deines vaters scheyn Gelawbst u nit das wir ains sein Die wort dye ich zw euch reden pin Dye gen nit von mir hin Aber der vatter der in mir beleybund ist Der tuet dye werch zw disser fryst Gelawbt ir nit dye ainikait des vatters vnd mein So solt ir doch durch dye werch gelaubig sein Fürwar fürwar wer in mich glauben hat Der tuet dye werch dye ich hab volpracht Vnd wirt auch grössere tuen dan dye sein Wan ich gee zw dem vatter mein Ewer hertz sol nit in traurikait stan Wan ich wyl euch nit ellend wayssen lan Dye welt wirt ain weyl nit sechen mich Aber ir werdt mich sechen sicherlich Darumb das ich thue leben Wird euch auch das leben geben Wer hat vnd wehalt mein gepot Der hat mich lieb an allen spot Vnd wer mich lieb hat auf erden Der mues von meinem vatter lieb gehabt werden Er wirt auch lieb gehabt von mir Vnd ich wird im mich selb offenwaren schyer Thatheus dicit saluatorj Lieber herr was ist dan geschehen Das dw yetz also hast geiechen Dw wellest dich selb vns offenwaren Vnd dye welt sol es nit erfaren Saluator subleuatis oculis in celum dicit patrj O lieber vatter von himelreych Die stunt ist kumen sicherleych Nu erklär deinen sun schon Das er dich erklar in dem himelischen tron Als dw im vber all menschen den gewalt hast geben Das er in geb das ewig leben Vnd das ist das ewig leben fürwar Das sy dich allain got erkennen gar Vnd das sy auch Jh{1}m xpem erkennen werden Den du in gesant hast auf dise erden Jch hab dich nun hye erklärt Vnd hab das werch auch nu pebärt Das dw auf gesetzt hast mir Das ich es sol volpringen schyer Darumb lieber vatter mein Erklär auch nun den sun dein Mit der klarhait die ich pey dir gehabt han Ee dan die welt ye anfang gewan Jch hab den menschen goffenwart den namen dein Dye mir auss der welt von dir gegeben sein Sy waren dein aber dw hast mir sy geben Vnd sy haben dein redt behalten eben Wan ich han in geben dye wort dye ich von dir gehört han Die haben sy wehalten schon Sy haben auch sicher erkant Das alles das du mir hast gesant Das sey von dir her kumen Sy haben auch warlich vernummen Das ich pin von dir auss gangen Vnd die welt hat mich enphangen Sy glauben auch sicherlich Das dw her hast gesendet mich Darumb allerliebster vatter mein Lass dir sy beuolhen sein Jch pit für sy gantz vnd gar Vnd nit gar für der welde schar Sunder nur für die lurger mein Dye dw mir geben hast wan sy sein auch dein Vatter ich pit nit für sy allain Sunder ich auch in der gemain Für all die auf disser erden Durch ire wort gelaubig werden Das sy alle ains sein Als ich vnd dw lieber vatter mein Damit das der welt bert pkant Das dw mich hast her gesant O heyliger lieber vatter mein Behalt sy in dem nammen dein Dye dw mir hast geben Das sy als wir in ainikait leben Dyeweil ich pey in pin gewesen Sein sy in deinem nammen wol genesen Wan ich hab sy behüet fürwar vnd nyembt ist auss in verdorben gar Dan allain der verdamnus kindt Damit die geschrift erfüllt worden sind Nun gee ich zw dir dahin Ven das hab ich gerdt dieweil ich in der welde pin Damit das sy das behalten in iren hertzen Mein volkommen frewd an allen schmerzen Dein wort hab ich in vor gesaidt Vnd die welt tregt in gross haß vnd neyd Wan sy sein nit auss der welt überall Als auch ich nit pin aus der welde zall Ich pit nit das du s nemst auß der weld hin dan Sunder das dw kain übel über sy lassest gan Vnd das dw in gebst dein heilikait Vnd machst sy heilig in der warhait Geleich als dw her hast gesendet mich hab ich sy auch in die welt gesant sicherlich Vnd ich heilig mich selb für sy auf disß erden Das sy auch in der warhait geheiligt werden Dw hast sy auch mit deiner lieb pegabt Geleich als ich s von dir han gehabt Vnd die klarhait die dw mir hast geben Hab ich in auch mit getailt eben Vater das ist der wille mein Das sy pey mir süllen sein Dye dw mir hast geben Das sy in ewikait mit mir streben Wan dw hast mich gehabt lieb vnd tzart Ee dan die welt geschaffen ward Gerechttter lieber vatter das sag ich Dye welt hat nit erkennet dich Aber ich hab dich sicher erkant Wan dw hast mich her gesant Vnd mein lurger erkennen auch an tzweifels glast Das dw mich her gesendet hast Wan ich hab in geoffenwart den namen dein Vnd wird in den noch hinfür tun schein Damit das die lieb peleyb in in Mit welcher ich von dir lieb gehabt woerden pin Dardurch ich pey in pleyb stätiklich An Endt ymmer vnd ewiklich Petrus dicit saluatorj Des helff vns dein heiliger nammen Nu sprechent alle sammen amen Iohannes dicit saluatorj O lieber herr vnd maister mein Nun tuest u vns offenlichen schein Von dem der dich hat her gesant Vnd vns wirt von dir kain beyspil bekant Nu wissen wir alle fürwar Das dir alle ding sein offen gar Das mercken wir an deiner sag Darumb ist nit not das dich yemant frag WIr glauben auch zw disser fryst Das dw warlich von got aus gangen pist Saluator ad discipulos Ietz gelaubt ir fürwar hab ich vernummen Aber es kumbt die stunt vnd ist kumen Das ir werdt zersträt yeder pesunderbar Vnd werdet mich verlassen allain gar Aber ich wirdt nit allain sein Wan pey mir wirdt sein der vatter mein Vnd das hab ich euch offentlich getan kunt Das ir in mir freyd habt zw disser stunt Fürwar sag ich es zimpt euch wol Das ich zum vatter gen sol Wan so ich meim vatter nit wurd nachen So wurd ir den heiligen geist nit enphachen So ich mich aber zw im thue wenden So wird ich euch denselben herab senden Der wirt albeg euer tröster sein Jr allerliebsten Jünger mein Jch hyet euch noch vil zw sagen Jr mügt es aber nit als ertragen So aber der geist der warhait wirt kemen Dauon ir alle warhait werd vernemmen Der wirt euch weisen in allen sachen Vnd wirt euch künftige ding offen machen Auber ewer traurikayt wirt sich ain weyl meren Doch wirt sy sich pald in

grosse freud keren In der weltdt werdt ir werden betzwungen Aber habt getrawen ich hab die belt vberwunden Nun solt ir tröstlich auff stan WIr wellen hin jn den gartten gan Et sic Saluator exit cum discipulis ad montem oliueti Et canunt inuicem Jn monte oliueti Orarani ad patrem Et dum p cedunt pussillum / Saluator dicit Petre Iacob vnd Iohan Jr drey sült mit mir gan Dye anderen süllen hye peitten mein Jch wil ain weil von euch sein Tunc ceteri discipuli recedunt Et assumptis tribus p cedit pussillum amplius et dicit eis Tristis est anima mea usque ad mortem sustinete hic et vigilate mecum Et dicit saluator Mein sel Ist traurig hüntz Jn den todt Wan sy fyöurcht des todes not Wachet hye vnd peyttet mein Jch wil ain weil am gepette sein Saluator p cedit pussillum abeys Et orat My pater sy possibile est transeadit a me calix Jste ver untammen non sicut ego volo sedt sicut tu Et dicit saluator Vater himlischer got Durch dein götlich gepot Sey mein gepet möglich So überheb der martter mich Doch dein will sol ergan Vnd nicht als ich gesprochen han Tunc surgit abrenone et reuertitur ad tres discipulos Et dicit eis Mocht Ir ain stunde nicht Mit mir sein an schlaffes phlicht Stet auff vnd wachet all Das ewer syn nicht vall Tunc surgunt Et dicit eis saluator Wachet sunder durch mein ger Ain weil so kum ich wider her Tunc vadit Ih s et orat eundem Sermonem My penr Vater himelischer got Quo finito Reuertitur ad discipulos Et dicit Petro Symon dormis no potuisti vna ora vigilare mecum Petre mochtest u nit an schlaffes begyr Ain weyl wachen mit mir Dw sprychst doch ane spot Dw wellest mit mir gen in den todt dicit Iacobus major Jac ens in terram o herr wir Von rechtter rewiger vnd trawriger begir Herr vnd maister so entschlaffen wir Saluator dicit discipulos Vigilare et orate vt non intret in temptationem spenus quid propmtus en caro aut infirma Et dicit Stet auff vnd wachet es ist zeyt Des todes zwkunft mir nachent leyt Pettet vnd habet hoffung Das ir nit valt in versuchung Der geyst ist gantz vnd gar peraydt Aber das fleysch leydt groß arbait Tercio vadit saluator et oradt Vt prius tunc apparuit ei angelus Vt dicit lucas Qui scz angelus dicit saluatorj Ih{1}u crist dw warer got Von himel pin ich deines vatters pot Der hat mich herab gesant Zw dir das sey dir bekant Das dw mit grosser not Vnd mit deinem pitteren tot Erlössest alle menschait Von Ewiglicher pittrikait Dauon so hab ainen guetten trost Von dir wirt alle welt erlost Saluator dicit patry Gotvatter des lob ich dich Jn deiner gothait Ewiglich Tunc surgit Ih{1}s ab renone Et venit ad discipulos Et dicit ad discipulos Nu mügt Ir schlaffen Vnd ain klaine tzeyt rasten Scola Iudeorum canit sy wlt Jnterim Iudas vadit ad

F048-01r,06 iudeos Et dicit ad Cayphan Herr wir süllen hin gan Jh{1}m ich verspechet han Jch gee vor ir volgt mir nach Vnd habt mitainander kainen sprach Chayphas dicit ad iudeos Lieben gesellen habt guetten fleys Ob er euch wolt werden zw weyss So fürt in mit synnen Das er ewch nit müg entrinnen Primus iudeus ad caypha Herr lasß dir kain sorg sein Er mues von mir leyden peyn Jch wil in schlachen auff seinen koph Mit meines schwerttes knoph Secundus Iudeus ad caypha O caypha lieber herr Er mag vns nit sein zw verr WIr wellen Jn wol finden Vnd mit guetten stricken pinden Et sic recedunt Et in transitu Judas alta voce canit Quencunqet osculatus fuero ipene est tenete eun Et dicit ad iudeos Secht wen Ich küss an seinen mundt Das sol euch vest wessen kunndt Den sült ir vachen an disser fryst Wan er der recht schuldig ist Vnd fürt in mit sicherhait Entrint er euch es ist mir laydt Tercius iudeus dicit ad iude Gee nur hin für dich Wir folgen dir sicherlich WIr wellen in wol pinden Das er nit pleibt dahinden Saluator dicit ad discipulos Stet auff vnd wachet Jn dysser zeyt Secht ir nit wie Judas daher Eylt Scola iudeorum canit sy placet Postea vadunt ad ortum Juda precedente et iudeis sequentibus iudas accedit ad

F048-01r,07 Ih{1}m Et clamat alta voce Aue Raby Et dicit Mayster piss gegrüsset zw tawsent stunt Jch muess dich küssen an deinen mundt hic dat osculun Saluator dicit ad Jude Amice ad quid venisti Frewnt zw wew pist u kummen Juda ich hab wol vernommen Wie dw mit deinem kuss in not Des menschen sun gibst in den tot Doch so wil ich dir zw disser fryst Meinen kuss versagen nicht Et tunc querit Saluator a iudeis Et dicit Was gefelt euch vnd wem sucht Jr Das sült ir sagen vnd verkünden mir Tunc iudei cadunt Retrorsun Jn terram et ad statim surgunt Primus Iudeus dicit saluatorj WIr suchen zw disser frist Jh{1}m der sich nennet kryst Saluator dicit ad iudeos Was pegert Ir zw disser stunt Das sült ir mir machen kunt Hic iterum cadunt et Statim surgunt Quartus Iudeus dicit WIr suchen zw disser frist Jh{1}m der sich nennet kryst Saluator dicit ad iudeos Dixi vobis prius Quia ego sun Jch hab euch s vor gesaydt das ich s pin Was habt ir noch in ewrem sin Tercia vice cadunt Retrorsun Et statim surgunt Saluator dicit ad iudeos Seydt das Ir nu suechet mich So lasset dye gen für sich Tunc Inponunt manus cun clamoribus Et tunc educto gladio dicit Petrus Herr ob es dein hertz begert So wer wir vns mit dem schwert Tunc petrus percucit malchun Et amputat ei auriculam dexteram Saluator dicit Ad petrum Conuerte gladium tuum In locum suum Et dicit Wer rach mit dem schwert wirbt Von dem schwert er verdirt Davon stöss dein schwert wider ein Jch hyet wol den vatter mein Gepetten sicher fürwar Das er mir grosser engelschar Zwelf hyet her gesandt Das sol dir wol sein pekant Aber ich mues leyden dye arbait Als dye prophetten haben gesaidt Vnd wil auch leyden sunder frey Fliech yederman da er sicher sey Tunc discurrunt discipulj Et secundus iudeus arripit Palium Johenis qui Recedit relicto palio Et dicit socio suo Schaw lieber wie Ist es mir ergangen Jch het ir ainen geuangen Jst das nicht ain wunder Er lies mir hye seinen plunder Vnd lawffet nackat dahin Er hat fürwar weysen syn Malchus dicit Awe das ich ye wardt geporen Das gerecht or hab ich verloren Das ist mir tztwar nit lieb Man wänt ich sey ain dieb Wo ich hinfür ymmernere Jn dem landt hin kere Saluator dicit malchy Lieber schweig vnd gehab dich wol Dein ding pesser werden sol Vnd ich wil zw disser stunt Dych sicher machen gesunt Tunc malchus apposita sib aure Eet sic ducunt Jh{1}m de hinc Et dicit malchus Ich pin gehayssen malchus Mein or das mir petrus Fräuenlichen ab schlueg Mit seinem schwert das er trueg Das hat Jh{1}s der guette man Mir gesetzet wider an Primus iudeus trudet Ih{1}m Et sic cadit in terram et statim surgit Et dicit saluator Als einen mörder sicherlich habt ir gesuchet mich Mit spiessen stecken vnd stangen Als ainen dieb gefangen Nu hab ich alle tag in dem tempel Der prophetten geschryft vnd exempel Euch

gepredigt vnd gelert offentlich Do schlueg noch fieng nyemant mich Nu fñrt ir mich in den todt Vnd leyd an schuld dye
 grosse not Tercius Iudeus dicit saluatorj Schweig vnd gee fñr dich pald Das dein der tewffel wald Sñll wir hye lossen
 deinem klaffen Wlr haben wol anderst zw schaffen Sinagoga canit Jnterim ducunt eum ad Annam Annas dicit Ir herren
 pringt Jr in daher Der das volk verkert mit seiner ler So hat Judas wol volpracht Was er zw thuen hat gedacht Sextus
 Judeus dicit Ia dein hertz wissen sol Judas hat verdyent wol Was man im zw disser tzeyt Guettes vm den trugner geydt
 Scola Iudeorum canit Deinde venit Johenes in

F048-01r,08 dutus alio pallio Et seq

F048-01r,09 tur a longe Et Johenes dicit ancille hostiarie Liebe dieren vergun dem geselln mein Das er auch gee
 herein Ancilla dicit Petro Gee herein nach deinem muet Vnd werm dich pey der gluert Annas dicit ad Ih{1}m Ih{1}u von
 der lere dein Solt u vns ettwas machen schein Saluator dicit ad annan Mein ler Ist offen vnd auch prayt Haymlich hab
 ich nit gesayt Jch hab gelert in dem tempel offenwar Do sich sammet aller Juden schar Frag dye die es haben gehñrt Die
 sagen dir meine wort die ich hab gelert Tunc quartus iudeus dat alapam Jh{1}u Et dicit Wle tars tu pey deinem leben
 Dem pischoff sñlich antwurt geben Cui saluator respondit Hat vbel geredt mein mundt Das petzewg an disser stundt
 Jst aber das ich dye warhait sag Warumb gibst u mir dan den grossen schlag Tunc ancilla dicit petro Ich sprich auff die
 trewe mein Dw pist auch der Junger sein Petrus Respondit ancille Fraw Ich erkenn sein nicht sicherlich Mit warhait ich
 das vergich Et hic gallus cantat Prima fice Deinde venit alia ancilla Et dicit ad petrum Dw pñswicht vnrainer Dw pist
 auch ir ainer Man kent es an der rede dein Das dw pist der Junger sein Petrus respondit Ich wñn dich trieg der pñsse geist
 Fñrwar ich wayss nit was dw sayst Wan des dw mich zeychest hye Sicher des erkant ich nye Malchus dicit petro Lieber
 ich wil dir der warhait iehen Jch hab dich mit im in dem garten gesechen Jch wil dir auch fñrwar sagen Dw pist der der
 mir das or hat ab geschlagen Vnd pist von gallilea kummen Das hab wir an deiner red wol vernummen Petrus dicit Dw
 lewgst vmb die payde Wil ich pey meinem ayde Schweren allhye zwhant Das ich in nie hab erkant Et do statim gallus
 cantat Tunc denus Jh{1}s respicit petrum et Recor